



An Bhruiséil, 28 Márta 2022
(OR. fr)

7493/22

LIMITE

FISC 81
ECOFIN 258

**Comhad Idirinstitiúideach:
2021/0433(CNS)**

NÓTA

ó:	An Uachtaránacht
chuig:	Coiste na mBuanionadaithe/An Chomhairle
Ábhar:	Treoir maidir le híosleibhéal domhanda cánachais a bhunú do ghrúpaí ilnáisiúnta san Aontas <i>Cur chuige ginearálta</i>

I. RÉAMHRÁ

1. An 8 Deireadh Fómhair 2021, tháinig Creat Cuimsitheach ECFE/G20 maidir le creimeadh an bhoinn agus aistriú brabúis ('an Creat Cuimsitheach') ar chomhaontú i dtaca le hathchóiriú a dhéanamh ar na rialacha idirnáisiúnta maidir le cáin a ghearradh ar bhrabúis na bhfiontar ilnáisiúnta. Chuir Ballstáit uile an Aontais in iúl go dtacaíonn siad leis an Ráiteas maidir le Réiteach Dhá Cholún chun aghaidh a thabhairt ar na dúshláin chánach a eascraíonn as digiteáil an gheilleagair. Sna conclúidí uaithi an 27 Samhain 2020, chuir an Comhairle in iúl go leanann sí de bheith ag tacú leis an obair ar an gCreat Cuimsitheach.¹

¹ 13350/20.

2. Tá an cánachas íosta éifeachtach ('Colún 2' den athchóiriú seo) bunaithe den chuid is mó ar dhá riail a bheidh le cur i bhfeidhm sa dlí náisiúnta ('rialacha GloBE') – an riail maidir le cuimsiú ioncaim (IIR) agus an riail maidir le híocaíocht faoi thearc-cháin (UTPR) – a bhfuil sé mar aidhm leo a áirithiú go ngearrfar cáin ag ráta éifeachtach 15 % ar a laghad ar bhrabúis a dhéanann grúpaí ilnáisiúnta a bhfuil láimhdeachas EUR 750 milliún nó níos mó acu. De réir Ráiteas mhí Dheireadh Fómhair ón gCreat Cuimsitheach, ba cheart Colún 2 a thrasú sa dlí in 2022, chun go dtiocfadh sé i bhfeidhm in 2023, agus táthar ag súil go dtiocfadh riail UTPR i bhfeidhm in 2024.
3. Chun a áirithiú go mbeidh cur chun feidhme rialacha GloBE comhleanúnach agus i gcomhréir le dlí an Aontais, agus bunaithe ar na rialacha samhla arna nglacadh faoin gCreat Cuimsitheach an 14 Nollaig, thíolaic an Coimisiún Eorpach, an 22 Nollaig 2021, togra le haghaidh Treoir ón gComhairle maidir le híosléibhéal domhanda cánachais a áirithiú do ghrúpaí ilnáisiúnta san Aontas Eorpach.² Leis an togra seo le haghaidh Treorach, a bhfuil sé mar aidhm leis Colún 2 a thrasú i ndlí an Aontais, leagtar amach na rialacha faoina gcuirfidh na Ballstáit cáin bhreise i bhfeidhm ar ioncam ísealchánach ó chomheintiteas aon ghrúpa náisiúnta nó ilnáisiúnta a thagann faoi raon feidhme an athchóirithe.
4. I gcomhthráth, leanfar den obair ar chur chun feidhme na rialacha maidir le cearta cánachais a leithdháileadh idir dlínsí ('Colún 1'), i gcomhréir leis an bplean cur chun feidhme mionsonraithe arna fhorbairt ag an gCreat Cuimsitheach chun coinbhinsiún iltaobhach a fhorbairt a bheidh ar oscailt le haghaidh a shínithe ó lár 2022 ar aghaidh d'fhonn é a chur chun feidhme ó 2023 ar aghaidh. Ag an gcruinniú a bhí acu ón 17 go dtí an 18 Feabhra 2022, d'athdhearbhaigh Airí Airgeadais an G20 go bhfuil siad tiomanta don tráthchlár sin.
5. Ghlac Coiste Eacnamaíoch agus Sóisialta na hEorpa a thuairim an 23 Márta 2022. Tiolacfaidh Parlaimint na hEorpa a tuairim go luath.

² 15294/21.

II. STAID NA hIMEARTHA

6. An 18 Eanáir 2022, bhí díospóireacht bheartais ag Comhairle ECOFIN maidir leis an togra le haghaidh Treorach,³ d'fhonn treoir pholaitiúil a chur ar fáil maidir le scrúdú teicniúil ar an téacs. Léiríodh sa díospóireacht go gcomhaontaíonn na Ballstáit uile gur tosaíocht í an tsaincheist seo agus nach mór na rialacha arna gcomhaontú ag Creat Cuimsitheach ECFE a thrasú i ndlí an Aontais ar an bealach is dílse is féidir agus a luaithe is féidir.
7. Ó thús mhí Eanáir 2022, agus an treoir ó na hairí á cur san áireamh, thionóil Uachtaránacht na Fraince naoi gcruinniú den Mheitheal um Cheisteanna Cánach (cánachas díreach, lena n-áirítear dhá chruinniú ardleibhéil) inar díríodh ar an scrúdú teicniúil ar an togra le haghaidh Treorach. A bhuí leis na cruinnithe sin, bhíodhas in ann, go háirithe, an fhoclaíocht sa téacs a ailíniú le rialachas samhla ECFE agus na príomh-shaincheisteanna atá fós le réiteach a shainaithint ar an leibhéal polaitiúil chun teacht ar chomhaontú maidir leis an téacs ar fad.
8. Rinneadh dul chun cinn sa chaibidlíocht sin ag cruinniú de Choiste na mBuanionadaithe an 9 Márta.
9. Ag cruinniú de Choiste ECOFIN an 15 Márta 2022, bhí formhór na mBallstát in ann tacú leis an téacs comhréitigh atá beartaithe ag Uachtaránacht na Fraince. D'iarr dhá Bhallstát go ndéanfaí coigeartú ar pharaiméadair an mhaolaithe idirthréimhsigh dá bhforáiltear in Airteagal 47a den Treoir. Chuir Ballstát amháin in iúl nach mbeadh sé in ann a thoiliú a thabhairt in éagmais nasc dlíthiúil le teacht i bhfeidhm Cholún 1 agus tá forchoimeádas grinnscrúdaithe parlaiminte ag Ballstát eile.

³ 5015/22.

10. Agus an plé sin á chur san áireamh, scaip an Uachtaránacht téacs comhréitigh nua an 28 Márta (7495/22) ina ndearnadh na socruithe maidir le maolú idirthréimhseach a choigeartú, agus an sprioc-am chun an clásal a fheidhmiú á shíneadh go 6 bliana agus uaslíon na máthairchuideachtaí atá bunaithe i mBallstát ar féidir leo leas a bhaint as an rogha sin á mhéadú go dhá cheann déag. Maidir leis na teagmhálacha déthaobhacha leis na toscaireachtaí lena mbaineann, measann an Uachtaránacht go bhfreastalaíonn an téacs comhréitigh ar na hionchais theicniúla a cuireadh in iúl agus gur cheart do na Ballstáit atá i gceist an glacadh leis an téacs anois.

III. AN PHRÍOMHCHEIST (*An nasc idir Colún 2 agus Colún 1*)

11. Tá an Ráiteas ó ECFE/G20 an 8 Deireadh Fómhair 2021 bunaithe ar dhá cholún ar leith faoi réir módúlachtaí cur chun feidhme éagsúla i gcomhréir leis an bplean cur chun feidhme mionsonraithe arna fhormheas ag an gCreat Cuimsitheach chun Coinbhinsiún Iltaobhach a fhorbairt freisin. Ag tús na caibidlíochta maidir leis an togra ón gCoimisiún le haghaidh Treorach, d'iarr roinnt Ballstát go mbeadh teacht i bhfeidhm an dá cholún nasctha trí theacht i bhfeidhm Cholún 2 a bheith ag brath ar theacht i bhfeidhm an choinbhinsiúin iltaobhaigh lena gcuirtear Colún 1 chun feidhme.
12. Le linn an chruinnithe a bhí ag an gComhairle ECOFIN an 15 Márta 2022, mhol an Uachtaránacht go mbeadh ráiteas ón gComhairle ag gabháil leis an gcomhaontú maidir leis an togra le haghaidh Treorach lena n-athdhearbhófar tiomantas na mBallstát uile don phróiseas leanúnach faoi chuimsiú an Chreata Chuimsithigh a mhéid a bhaineann le Colún 1, i gcomhréir leis an tráthchlár maidir le cur chun feidhme a formheasadh i mí Dheireadh Fómhair 2021 agus ina n-iarrfar ar na Stáit eile is Páirtithe an tiomantas sin a chomhlíonadh. Níl ach aon Bhallstát amháin fágtha nár léirigh a thacaíocht don réiteach sin go fóill.

13. Cuireann an Uachtaránacht in iúl gur dhearbhaigh an Coimisiún agus Seirbhís Dlí na Comhairle na deacrachtaí dlíthiúla a bhaineann leis an iarraidh, atá fós á forchoimeád ag Ballstát amháin, maidir le teacht i bhfeidhm an dá cholún a nascadh trí theacht i bhfeidhm Cholún 2 a bheith ag brath ar theacht i bhfeidhm an choinbhinsiúin iltaobhaigh lena gcuirtear Colún 1 chun feidhme. Ina theannta sin, níl tromlach na mBallstát in ann glacadh leis an iarraidh sin.
14. Mar sin féin, mar a rinne an G20 le déanaí, ní mór don Aontas leanúint dá thiomantas polaitiúil a athdhearbhú maidir leis an obair ar an dá cholún a thabhairt i gcrích i gcomhréir leis an tráthchlár a leagtar amach i gcomhaontú an 8 Deireadh Fómhair 2021. Sa chomhthéacs sin, coimeádann an Uachtaránacht a moladh go mbeidh ráiteas ón gComhairle ag gabháil leis an gcomhaontú maidir leis an Treoir. Leagtar an ráiteas amach san Iarscríbhinn a ghabhann leis an nóta seo.

IV. NA CHÉAD CHÉIMEANNA EILE

15. Molann an Uachtaránacht an téacs comhréitigh a leagtar amach in 7495/22 mar bhonn do chomhaontú maidir leis an gcomhad seo.
16. Dá bhrí sin, iarrtar ar Choiste na mBuanionadaithe an méid seo a leanas a dhéanamh:
- féachaint le teacht ar chomhaontú maidir leis an téacs le haghaidh cur chuige ginearálta i ndáil leis an togra reachtach seo, ar bhonn an téacs comhréitigh a leagtar amach in 7495/22, d'fhonn an Treoir a ghlacadh, faoi réir tuairim ó Pharlaimint na hEorpa a fháil agus faoi réir athbhreithniú dlítheangeolaíoch ar an téacs;
 - a mholadh don Chomhairle an ráiteas atá le cur sna miontuairiscí, mar a leagtar amach san nóta seo é, a fhormheas.

Dréachtráiteas ón gComhairle

Déanann an Chomhairle an méid seo a leanas:

ATHDHEARBHAÍONN SÍ tiomantas an Aontais don ráiteas maidir le réiteach dhá cholún chun aghaidh a thabhairt ar na dúshláin chánach a eascraíonn as digitiú an gheilleagair agus a phlean cur chun feidhme, a formheasadh i mí Dheireadh Fómhair 2021, agus IARRANN SÍ ar chomhaltaí uile Chreat Cuimsitheach ECFE/G20 um Chreimeadh an Bhoinn agus Aistriú Brabúis (BEPS) seasamh lena ngealltanas maidir leis an dá cholún;

TUGANN SÍ DÁ hAIRE go bhfuil aghaidh á tabhairt ag an Aontas, ó 2017 i leith, ar na dúshláin chánach a eascraíonn as digitiú an gheilleagair agus gur chuir an obair leanúnach atá á déanamh aige leis an gcomhaontú domhanda maidir leis an réiteach dhá cholún;

DEIMHNÍONN SÍ a tacaíocht leanúnach don obair a dhéantar i gCreat Cuimsitheach ECFE/G20 maidir le creimeadh an bhoinn agus aistriú brabúis agus tá sí tiomanta go hiomlán, laistigh den tréimhse ama a comhaontaíodh, an obair leanúnach maidir le gnéithe Cholún 1, lena n-áirítear an Coinbhinsiún Iltaobhach, ar cheart dó a bheith oscailte le haghaidh a shínithe i lár 2022 agus ar cheart dó teacht i bhfeidhm le linn 2023, a thabhairt i gcrích go rathúil;

CUIREANN SÍ I dTREIS go ndéanfaidh an Chomhairle, de réir mar is gá, athmheasúnú ar an staid maidir le Colún 1, i gcomhthéacs na hoibre atá á déanamh faoi láthair i gCreat Cuimsitheach ECFE maidir le creimeadh an bhoinn agus aistriú brabúis, d'fhonn teacht ar réiteach ar na dúshláin chánach a eascraíonn as digitiú an gheilleagair.

IS DÍOL SÁSAIMH DI gur thángthas ar chomhaontú go gasta maidir leis an gcomhad seo; CUIREANN SÍ i bhFIOS GO LÁIDIR nár cheart úsáid an ghnímh tharmligthe sa chomhad sonrach seo a fheiceáil mar fhasach d'ionstraimí reachtacha eile a ghlahtar faoin nós imeachta speisialta reachtach is infheidhme maidir le cúrsaí cánach.